



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DCCCLXXII. ad annum DCCCCIX.

Parisiis, 1644

Epistola XXXVI. Ioannis Papae VIII. Ad Landvlpvm Episcopvm Capvanvm.
Mittit legatos, vt Docibilis Hypatus petierat: hortatur vt det operam vna
cum legatis, vt pactum cum Saracenis initum ...

urn:nbn:de:hbz:466:1-15967

gula scribere tentassemus, facilius nobis charta quam fermo deficeret) vt sicut vnum corpus sumus in capite Christo, & alter alterius membra, ita nobiscum pariter condoleatis & compatiamini: quia *si quid vnum patitur membrum*, vt Doctor gentium ait, *compatiuntur omnia membra*: & *si compatimur, & conregnabimus*. Condolentes autem nobis, & compatientes, accedatis ad Christianissimum filium nostrum, & consilium Domini ab eo non abscondatis: suggerentes, & exhortantes, vt perpendat quis & quam terribilis sit ille, qui hunc ante sæcula huic præfuturum regioni prædestinauerit, & quam districte ab eo exacturus sit quod commisit: qui scilicet tam preciosi sanguinis fusione quod credidit emit. Meminerit etiam, quia & nos illum præ ceteris propinquis & æmulis eius amauimus, elegimus, & prætulimus. Vnde & eum aduersus omnes hostes ecclesiæ non solum defenso-rem, sed & patronum & aduocatum nostrum existere proposuimus: vt quod ei nos apud Deum esse satagimus, ipse inter homines pro nobis fieri non detrectet: præcipue vt accelerans nobis subueniat, & sine mora contra perfidos Christianos & infideles succurrat. In quo sanctæ fraternitati vestræ præ omnibus laborandum est: pro commisso scilicet sibi sacerdotali officio, & quia, vt cum propheta veridico fateamur, si hæc humiliatur, ad cuius confugietis auxilium, vel vbi relinquetis gloriam vestram? *Isa. 10.*
 Data III. Kalendas Martii, indiçtione decima.

EPISTOLA XXXVI.

IOANNIS PAPÆ VIII.

AD LANDVLPHEM EPISCOPVM CAPVANVM.

Mittit legatos, vt Docibilis Hypatus petierat: hortatur vt det operam vna cum legatis, vt pactum cum Saracenis initum dissoluatur; se quidquid ab eo constitutum fuerit, approbaturum.

Landulpho episcopo Capuano.

NOVERIT industria tua, nos tam Sergii magistri militum, quam Docibilis Hypati epistolas suscepisse: quibus cognouimus eos excusabiles se velle coram nobis reddere tentauisse super contracto infando fœdere, quod

cum Saracenis impie pepigerunt, nec absoluerunt; in tantum, ut gerulus earum referret iam fuisse diruptum, nisi dilectio tua pro reuerentia nostri, nostrum in hoc expectandum arbitrium iudicasset. Quamuis nec hæc ipsa ex toto crediderimus, eo quod de his nullam tuam susceperimus. Verum quia nos prædictus Docibilis Hypatus, ut missos nostros pro tanto bono, & omni ecclesiæ profuturo perficiendo, Caietam mitteremus, obnixe rogauit; ne negligentia nostra diffamaret tantam humani generis salutem postpositam, misimus illuc Vualbertum Portuensem, & Eugenium Ostiensem, sanctissimos episcopos dilectos & consiliarios nostros, ut siue cum magistro militum, siue cum missis eius loquentes, pactum illud, quod perditionis est causa, dissolui per omnia suaderent, in tuæ maximæ sapientiæ illos fiducia destinantes. Quapropter hortamur, ut solertia tua tanto in hoc laboret, quanto non solum a nobis condignam vicissitudinem, sed & ab ipso Deo & Domino nostro coronam se percepturam in cælestibus non poterit dubitare. Admonemus itaque, *instæ opportune, importune*, ut tam impio discisso ^{1. Tim. 4.} fœdere, pax Dei, quæ exuperat omnem sensum, nobis ^{Philip. 4.} tandem cælitus restituatur. Si qua vero inter hæc se ingerit inimica Deo contentio, tuæ sapientiæ manibus detergatur: nulla simultas, nulla rerum vel gloriæ cupiditas a tanto lucro atque profectu vos subtrahat; quia, quidquid illud est, pacifice poterit post modicum dirimi, & cum caritate, nobis quoque mediantibus, diffiniri. Certet ergo, laboret, & satagat industria tua, & in his vice nostra utatur; & quidquid agendum, quidquid communi ex placito fuerit construendum, vice nostra faciat atque constituat. Alacriter enim quod tua dilectio constituerit, & immobili placito fixerit, adimplere atque perficere procurabimus, nihil ut in hoc hæsitet dilectio tua magnopere commonentes. Prædictis autem missis nostris missos tuos indifferenter & absque mora Caietam dirigere procurato, qui de his omnibus cum eis salubriter tractare valeant, & quæ sunt agenda, perficere. Optamus, &c. Data Idus Martii, indictione decima.